



**Sumáriu Kazu
Tribunál Distritál Suai
Dezembu 2022**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Distritál Suai
1. Totál kazu ne'ebé JSMP monitoriza: 14**

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun familia, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	4
Artigu 154 KP no artigu 2,3, 35 Lei Kontra Violénsia Doméstika (LKVD) no	Maus tratus kónjuje ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun familia, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku) no arma brankas	1
Artigu 177 KP no artigu 182 KP	Abuzu seksuál ba menór agravasaun	1
Artigu 145 KP	Ofensa ba integridade fizika simples	2
Artigu 316 KP	Kontra bandu	1
Artigu 244 KP	dezobidensia	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

	Prátika ilísita arte marsiais	1
Artigu 145 KP no Artigu 217 KP	Ofensa ba integridade fizika simples ho flora no fauna	1
Artigu 154 KP no Artigu 145 konjuga artigu 2,3, 35 Lei Kontra Violénsia Doméstika (LKVD) no	Maus tratus kónjuje ho ofensa ba integridade fizika simples ho naturza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku) no arms brankas.	1
Artigu	Danu agravadu	1
Totál		14

2. Totál desizaun ne'ebé JSMP monitoriza:14

Tipu pena	Artigu	Númeru
Pena prizaun	Artigu 66 KP	2
Suspensaun ba prizaun nia ezekusaun	Artigu 68 KP	9
Absolve		2
Omologa Suspensaun ba prizaun nia ezekusaun	Artigu 68KP no artigu 262 KPP	1
Totál		14

3. Totál kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua tuir JSMP nia monitorizasaun:0

1. Krime ofensa ba integridade fizika simples ho natureza violénsia doméstika

Nú. prosesu : 0004/22.MFFBL
 Kompozisaun tribunál : Singulár
 Juís : Dr. Nason Mário Armino Marques Doutel
 Prokuradór : Dr. Nelson Jose Soares Magno
 Defeza : Domingos dos Santos
 Desizaun : Pena Prizaun fulan 1 Suspende tinan 1

Iha 01 Dezembru 2022, Tribunál Distritál Suia prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AdCO hasoru nia feen AM, iha Munisípiu Manufahe.

Akuzasaun Prokuradór

Prokuradór akuza katak iha 28 Feveireiru 2022, iha oras tuku 16:00 lokraik, arguidu tuda bikan dala ida ba lezada nia liman parte karuk rezulta moras no kanek. Antes ne'e arguidu han hotu modo no lezada husu arguidu maibé arguidu nega no dehan fali sira nia oan

mak han hotu modo ne'e ho ida ne'e sira diskuti malu arguidu nerboju halo agreasaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

Produsaun ba prova sira

Iha julgamentu arguidu konfesa faktu hotu iha akuzasaun no deklarata katak depoisde akontesimentu arguidu mak lori lezada ba óspital no fila husi óspital arguidu husu kedan deskulpa ba lezada, arguidu deklarata tan katak depoisde akontesimentu arguidu to'o agora labaku ona lezada, arguidu arrepende katak baku feen ne'e ladi'ak. Alende ne'e lezada kontinua konfirma faktu sira iha akuzasaun no reforsa katak depoisde akontesimentu fila husi óspital arguidu husu kedas deskulpa ba lezada no to'o agora arguidu labaku ona lezada no antes mós arguidu nunka baku lezada.

Alegasaun finál

Prokuradór haktuir katak arguidu konfesa faktu sira iha akuzasaun no lezada konfirma, prokuradór entende katak arguidu hatene katak tuda bikan ba lezada ne'e lei bandu maibé arguidu nafatin halo hasoru lezada tanba ne'e pena ne'ebé adekua ba arguidu mak pena prizaun.

Entretantu, defeza haktuir katak perante julgamentu arguidu konfesa no konfirma husi lezada, arguidu rasik mak lori lezada ba óspital di'ak malu kedas no to'o agora la iha problema, tanba ne'e pena ne'ebé mais adekua ba arguidu mak pena admoestasaun.

Desizaun

Depoisde avalia faktu sira hotu, tribunál prova katak arguidu halo duni agresaun hasoru lezada, arguidu lori bikan tuda dala ida lezada nia liman parte karuk rezulta kanek.

Bazeia ba faktu provadu ne'e no tetu mós sirkuntansia atenuante sira hanesan arguidu foin primeiravés mai hatan iha tribunál no depoisde akontesimentu to'o agora la iha problema, nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

2. Krime ofensa ba integridade fizika simples natureza violénsia doméstika

Nú. prosesu	: 0002/22.ANHTU
Kompozisaun Tribunál	: Singulár
Juíis	: Dra. Dra. Patricia de Fatima Xavier
Prokuradór	: Dr. Pascásio de Rosa Alves
Defeza	: Domingos dos Santos (Advogadu privadu)
Desizaun	: Pena prizaun fulan 4 Suspende ba tinan 1

Iha 05 Dezembru 2022, Tribunál Distritál Suai prezide julgamentu leitura imediata ba krime ofensa ba integridade fizika simples natureza violénsia doméstika envolve arguidu AM hasoru nia feen RdA, iha Munisipiu Manufahe.

Akuzasaun prokuradór

Prokuradór akuza katak 3 Maiu 2022, iha oras tuku 1:00 madrugada, arguidu basa dala lima iha lezada nia ulun, tuku dala haat iha kanoruk no buti lezada nia kakorok riba ba rai no sama dala ida iha lezada nia kotuk laran. Antes ne'e lezada ho sira nia oan atu ba tuir misa kalan nian, maibé arguidu la hatan lezada tuir misa iha kalan, nune'e arguidu ho lezada diskute malu no arguidu komete aktu refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak momentu ne'e bandu lezada atu labele ba misa tanba kalan boot ona no arguidu ho lezada diskute malu arguidu nerboju baku lezada no lezada fila baku fali arguidu nia kotuk laran dala haat nune'e arguidu nerboju halo tan aktu sira seluk hanesan haktuir iha akuzasaun, arguidu deklarata tán katak depoisde komete aktu ne'e arguidu ba toba kedan iha to'os no dadeer mai di'ak malu kedan ho lezada, arguidu deklarata arrepende nia hahalok katak baku feen ne'e ladi'ak, promete futuru sei lakomete tan hahalok hanesan hasoru lezada.

Presinde lezada.

Alegasaun finál

Prokuradór haktuir katak arguidu komete krime ofensa simples ho natureza violénsia doméstika hasoru lezada, arguidu rasik konfesa, tanba ne'e prokuradór husu ba tribunál atu kondena arguidu ho pena suspensaun.

Entretantu defeza husu ba tribunál atu kondena arguidu ho pena multa bazeia ba sirkuntansia sira hanesan di'ak malu kedas ho lezada, arrepende nia hahalok no promete iha futuru sei lakomete tan hahalok hanesan hasoru lezada.

Desizaun

Depoisde avalia faktu sira hotu, tribunál prova katak arguidu komete aktu hasoru lezada ne'ebé arguidu konfesa. Bazeia ba faktu provadu sira ne'e no tetu mós sirkuntansia atenuante sira hanesan arguidu konfesa, dia'k malu fali ona, nune'e tribunál konklui prosesu no kondena arguidu ho pena prizaun fulan 4 suspende ba tinan ida.

3. Krime ofensa ba integridade fizika simples

Nú. prosesu	: 0054/22.CVSUI
Kopozisaun tribunál	: Singulár
Juís	: Dr. Naason Mário Armindo Marques Doutel
Prokuradór	: Dr. Rafael Jeronimo Gusmão
Defeza	: Dr. Domingos Dos Santoa
Desizaun	: Pena prizaun fulan 3 suspende tinan 1

Iha 05 Dezembru 2022, tribunál distritál Suai prezide julgamentu leitura sentensa ba krime ofensa ba integridade fizika simples envolve arguidu Clementino da Silva hasoru Lezada Meliana Soares, iha Munisípiu Covalima.

Akuzasaun prokuradór

Prokuradór akuza katak iha 22 Jullu 2022, iha oras tuku 12:00 meiodia, arguidu foti fatuk tuku dala ida iha lezada nia ulun no buti lezada nia kakorok rezulta moras no kanek. Antes ne'e lezada ko'alia hela ho nia inan maibé arguidu sente-an katak lezada ho nia inan konta arguidu nia vida, nune'e arguidu nerboju no halo agreasaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun, rguidu deklarata katak foti fatuk tuku duni ba lezada nia ulun maibé nia la buti lezada nia kakorok, arguidu foti fatuk tuku ba lezada nia ulun tanba lezada hamri'ik aperta arguidu no ka'er arguidu nia faru gola dada tun arguidu ba rai.

Alende ne'e, lezada kontinua konfirma faktu sira iha akuzasaun, lezada haktuir katak arguidu foti fatuk tuku uluk lezada nia ulun hafoin lezada hamri'ik besik arguidu atu hadau fatuk iha arguidu nia liman, lezada deklarata katak depoisde akontesimentu ba kedas óspital hodi halo tratamentu.

Alegasaun finál

Prokuradór, haktuir katak mesmu iha julgamentu arguidu konfesa parsilamente ba faktu sira maibé lezada kontinua konfirma faktu sira iha akuzasaun tanba ne'e husu ba tribunál atu kondena arguidu ho konfiksaun tribunál nian.

Entretantu defeza husu ba tribunál atu kondena arguidu tuir konfiksaun tribunál nian ne'ebé bazeia deklarasaun sira ne'ebé produs durante julgamentu produsaun prova.

Desizaun

Depoisde avalia faktu sira hotu, tribunál prova katak arguidu foti fatuk tuku dala ida iha lezada nia ulun no buti dala ida lezada nia kakorok. Bazeia ba faktu provadu sira ne'e no tetu mós sirkunstansia atenuante sira hanesan arguidu foin mak mai hatan iha tribunál no promete ona sei larepete ninia hahalok ne'e hasoru lezada inklui ema seluk, nune'e tribunál konklui prosesu ne'e no kondena arguidu ho pena prizaun fulan 3 suspende ba tinan 1.

4. Krime maus-tratus ba kónjuje no arma brankas

Nú. prosesu : 0014/22.CVZML

Kompozisaun tribunál : Koletivu

Juís : Dra. Patricia de Fatima Xavier, Dr. Jose Maria Araujo no
Dr. Naason Mário Armindo Marques Doutel,

Prokuradór : Dr. Nelson J. S Magno
Defeza : Dr. Jonas Henrique
Desizaun : Pena Prizaun Tinan 3 Suspende Tinan 5

Iha 05 Dezembru 2022, Tribunál Distritál Suia prezide julgamentu leitura akordaun ba krime maus-tratus ba kónjuje ne'ebé envolve arguidu MC hasoru nia feen, iha Munisípiu Covalima.

Akuzasaun prokuradór

Prokuradór akuza katak iha loron la apura fulan Jullu 2022 iha oras tuku 00:20 kalan, arguidu fila husi nia feton nia uma ho kondisaun lanu no iha momentu ne'e lezada toba dukur, arguidu ba basa dala ida iha lezada nia hasan parte loos halo lezada hakfodak no hatete ba arguidu '*nusá kalan boot baku fali hau, ne'e viziñu sira dehan saida*'. Hafoin arguidu kontinu basa no tebe dala barak iha lezada nia isin loloon tomak no lezada sente moras hodi halai ba liur, arguidu tuir basa no tuku tan dala barak iha lezada nia isin loloon, hafoin lezada halai tama fali ba uma laran, arguidu mós tama tuir rasta lezada nia lipa ne'ebé lezada hatais to'o lezada kondisaun molik no arguidu tuku tan dala rua iha lezada nia kanuruk, tuir mai arguidu sai ba foti pipa no tama fali ba uma laran, lezada tenta loke janela atu haksoit mak arguidu lori pipa ne'e fai dala rua iha lezada nia kotuk laran no lezada konsegue sai husi janela ba iha liur hodi halai ba nia tiun nia uma.

Akontese tuir mai iha 01 Agostu 2022, iha oras tuku 17:00 lokraik, arguidu ho kondisaun lanu tuir ba testemuña Fransisco Soares nia uma ne'ebé lezada hela ba no husu atu lezada fila ba sira nia uma, maibé testemuña dehan ba arguidu '*ó nia oin seidak mós nune'e aban mak lori ita boot nia feen ba ó nia uma*', hafoin arguidu ho testemuña diskute malu no arguidu fila ba uma foti katana fila no arguidu haree hetan lezada hakat ba atu taa maibé lezada tauk no halai ba subar iha nakukun laran.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 no artigu 2 (a), 3(a) no 35 (a) husi LKVD, konjuga ho artigu 2 (b,j) husi lei Nú 5/2017.

Produsaun ba prova sira

Iha prosesu julgamentu arguidu deklar katak faktu balun loos no balun la loos, arguidu deklar katak faktu sira seluk ne'e loos hotu, maibé faktu kona-ba lori katana atu taa lezada ne'e la loos, arguidu arrepende nia hahalok, promete futuru sei la repete hahalok hirak ne'e, arguidu mós deklar tan antes no depoisde akontesimentu nunca baku lezada no foin mak mai hatan iha tribunál.

Alende ne'e lezada deklar katak faktu sira kona-ba arguidu baku ne'e loos hotu, maibé kona ba rasta lipa ne'e la loos tanba momentu arguidu baku ne'e lipa nain mak monu no la'os isin molik kedan maibé momentu hatais hotu kalsa ida, lezada deklar katak ho arguidu di'ak malu fali ona no to'o agora la iha problema, lezada perdua arguidu nia hahalok no hakarak atu dada kazu ne'e.

Testemuña FS hanesan lezada ho arguidu nia tiun, depoimenta katak momentu lezada halai ba uma lezada hatais hela kalsa ida no hatais mós nia faru no lezada dehan arguidu baku lezada no foti pipa fai ba lezada, tetstemuña mós depoimenta katak akontese tuir mai ne'e arguidu ho kondisaun lanu ba iha testemuña nia uma no dehan atu lori nia feen fila ba sira nia uma maibé testemuña hatan dehan depois lokraik mak hau lori ó nia feen ba uma ho ida ne'e arguidu diskute malu ho testemuña no atu oho nia feen maibé lakonseque, testemuña haktuir katak sira agora di'ak malu ona no argora lezada fila ona ba sira nia uma. testemuña haktuir katak sira problema ne'e lezada sempre halai ba uma no toba iha uma no ba kazu ida ne'e hamutuk dala tolu ona.

Alegasaun finál

Prokuradór haktuir katak lori arguidu mai hatan iha tribunál tanba arguidu komete krime maus-tratus kónjuje no arma brankas, iha audénsia julgamentu arguidu konfesa parsial, momentu ne'e arguidu la lori katana atu taa lezada, maibé lezada konfirma katak momentu ne'e arguidu atu taa duni lezada nune'e mós deklarara katak momentu ne'e saia ne'e la'os rasta mak monu maibé nain monu, prokuradór haree katak agora sira di'ak malu ona no hela hamutuk nafatin iha uma ida, bazeia ba sirkuntansia sira ne'e husu ba tribunál atu kondena arguidu tuir tribunál nia konfiksaun.

Entertantu, defeza haktuir katak iha perante julgamentu arguidu konfesa no konfirma husi lezada no testemuña, maibé sira agora di'ak malu ona no la iha tan ona problema seluk, nune'e husu ba tribunál atu kondena arguidu tuir konfiksaun tribunál nian.

Desizaun

Depoisde avalia faktu sira hotu, tribunál prova katak arguidu nia hahalok ne'e priense elementu krime maus-tratus ba kónjuje no krime arma brankas, bazeia ba arguidu nia deklarasaun no konfirma husi lezada no reforsa husi tetemuña, tribunál mós haree katak arguidu foin mak mai hatan iha tribunál no depoisde akontesimentu sira di'ak malu kedan, nune'e tribunál konklui prosesu ne'e no kondena arguidu ba krime maus-tratus ba kónjuje tinan rua ba krime arma brankas tinan tolu, hamutuk tinan lima, nune'e tribunál aplika pena únika tinan tolu suspende ba tinan lima.

5. Krime maus-tratus ba kónjuje apensu ofensa ba integridade fizika simples ho natureza violénsia doméstika rua no arma brankas.

Nú. prosesu : 0037/22.CVSUI, 0085/21.CVSUI, 0004/22.CVSUI
Kompozisaun tribunál : Koletivu
Juís : Dra. Patricia de Fatima Xavier, Dr. Jose Maria Araujo no
Dr. Naason Mário Armindo Marques Doutel,
Prokuradór : Dr. Rafael Jeronimo Gusmão
Defeza : Dr Domingos dos Santos
Desizaun : Pena prizaun tinan 7

Iha 05 Dezembru 2022, Tribunál Distritál Suia prezide julgamentu leitura sentensa ba krime maus tratus ba kónjuje apensu ofensa ba integridade fizika simples natureza violénsia doméstika no arma brankas ne'ebé envolve arguidu DB hasoru nia feen MB, iha Munisípiu Covalima.

Akuzasaun prokuradór

Prokuradór akuza katak iha 25 Abril 2022 iha oras tuku 23:00 kalan arguidu sunu lezada nia karun ne'ebé bain bain lezada uza ba sosa batar, lezada ba atu hadau maibé arguidu kaer lezada nia fuuk riba lezada ba rai no fai lezada nia ulun ba rai dala barak no kontinua kaer lezada nia fuuk rasta ba mai halo lezada nia ain kona pregu rezulta kanek.

Akontese iha 19 Novembru 2021, iha oras tuku 6:00 dadeer arguidu tuda lezada maibé la konsegue kona tanba lezada halai, tuir mai iha oras tuku 9:00 dadeer lezada sona dosi iha nia bin Maria nia uma, derepente arguidu mosu iha ne'eba ho katan no tama ba dapur laran no dudu malu ho lezada halo katana nia kroat kona lezada nia liman fuan boot sorin loos kanek ran sai barak hafoin arguidu lori katana nia kotuk ne'ebé taa dala rua iha lezada nia kabun no kabas sorin loos. Hafoin halo agreasaun fiziku hasoru lezada no foti lezada nia ropa no karun mamuk 50 sunu mutuk hotu.

Iha 03 Janeiro 2022, iha oras tuku 9:00 dadeer, lezada fasé hela roupa no arguidu fila husi to'os mai haree osan iha pasta laran la iha, halo arguidu nerboju sai husi uma tuda kedas dala ida lezada maibé la konsegue kona, lezada tenta halai maibé arguidu kaer ai pedasuk ida duni tuir lezada no toman hodi baku dala rua iha lezada nia kotuk laran parte karuk rezulta moras no bubu.

Prokuradór akuza arguidu kontra artigu 154 KP kona-ba Mau stratus ónjuje moldura penál tinan 2 to'o tinan 6, no krime ofensa ba integridade fizika simples ho moldura penál tinan 3 ka multa konjuga ho artigu 2,3 (b) 35 (b) no 36 LKVD no artigu artigu 20 (1) Lei Arma Brankas.

Produsaun ba prova sira

Iha prosesu julgamentu, arguidu deklarara katak faktu balun loos no balun la loos, arguidu deklarara katak rasta lezada nia fuuk ne'e loos maibé ba faktu sira seluk ne'e la loos hotu, arguidu la foti katana taa lezada no la foti fatuk tuda lezada, arguidu mós nega katak momentu akontesimentu iha 3 Janeiro 2022 la foti fatuk tuda ba lezada no labaku lezada hanesan iha akuzasaun. Arguidu deklarara katak sei hadomi nia feen no promete futuru sei larepete ninia hahalok ne'e hasoru lezada, arguidu deklarara katak lezada agora dadaun ne'e hele iha Dili durante fulan 4 ona.

Antes atu rona lezada nia deklarasaun, lezada sente arguidu tuur iha sala audénsia ta'uk no fó nia deklarasaun nune'e tribunál koletivu deside hodi haruka arguidu sai husi sala julgamentu hafoin rona lezada nia deklarasaun.

Iha julgamentu, lezada kontinua konfirma faktu sira hotu no lezada deklarara katak antes iha 2015 arguidu baku bebeik maibé la rezulta kanek no ran la sai nune'e la hato'o keixa hasoru arguidu, lezada deklarara tan katak iha 2020 lezada ba faan batar iha Dili no fila mai suai no lezada foin tun husi kareta Bus arguidu tuku kedan dala ida iha lezada nia ren-toos kanek boot suku pontu hitu, maibé la apresenta keixa hasoru arguidu, lezada nafatin tauk no trauma ho arguidu, bainhira arguidu iha uma tanba baku bebeik lezada nune'e lezada deside ho nia oan sira hodi ba hela iha Dili, lezada lakohi ona moris hamutuk ho arguidu.

Testemuña BGA hanesan sira nia viziñu depoimenta katak momentu iha ne'eba lezada sona hela dosi iha dapur laran maibé derepente lezada sai husi dapur arguidu mós halai tuir no testemuña haree lezada nia liman kanek no arguidu mós kaer katana no testemuña hakilar arguidu derepente viziñu João mai hadau tiha katana no lakleur Polísia sira mós to'o mai lori kedas arguidu ba iha edifisiu PNTL nian, testemuña depoimenta katak la iha kuiñesimentu ba kazu sira seluk.

Alegasaun finál

Prokuradór haktuir katak arguidu provadu komete krime haat ne'ebé inputa ba nia, mesmu arguidu nega faktu sira hotu maibé lezada konfirma faktu iha akuzasaun no reforsa husi testemuña no rezultadu ezaminaun husi PRADET, prokuradór haree katak la iha sirkuntansia atenuante ba arguidu ho nune'e husi krime haat ne'e prokuradór husu ba tribunál atu kondena arguidu ho pena únika efetiva tinan ualu.

Entretantu defeza haktuir katak perante julgamentu arguidu deklarara katak foin primeiravés mai hatan iha tribunál, arrepende ninia hahalok, sei hadomi nia feen no iha possibilidade sira fila fali ba malu ho razaun hirak ne'e defeza husu ba tribunál ba krime haat ne'e kondena arguidu pena suspensaun tinan haat.

Iha alegasaun, tribunál koletivu delibera katak durante iha prosesu julgamentu bazeai ba lezada nia deklarasaun katak lezada agora dadaun ne'e la fila ba sira nia uma tanba tauk arguidu no bainhira atu rona lezada nia deklarasaun lezada tauk tanba arguidu iha sala julgamentu tribunál tetu buat sira ne'e tribunál koletivu deside altera tiha medida koasaun antes ne'ebé arguidu kumpri TIR ba fali Prizaun preventiva no hein desizaun. Prokuradór no defeza la iha opozisaun.

Desizaun

Tribunál halo alterasaun kualifikasaun tanba durante produsaun prova iha faktu foun mosu. Katak iha 2020 momentu ne'eba lezada fila husi Dili foin tun husi kareta arguidu tuku kedan dala ida iha lezada nia oin laran no nia ren-toos nakles suku pontu hitu no tribunál mós prova hotu kedas ba faktu sira iha akuzasaun bazeia ba faktu provadu sira ne'e no tetu mós sirkuntansia hotu-hotu ne'ebé haleu krime, nune'e tribunál konklui prosesu ne'e no kondena arguidu ba krime maus-stratus ba kónjuje tinan neen ba krime ofensa integridad fízika simples kada krime tinan rua no ba krime arma brankas tinan hitu, pena hirak ne'e tribunál konklui aplika pena únika tinan hitu ba arguidu.

6. Krime ofensa ba integridade fizika simples ho natureza violénsia doméstika

Nú prosesu : 0017/22.CVMCT
Kompozisaun Tribunál : Singulár
Juís : Dr. Naason Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Angelmo Pinto
Desizaun : pena prizaun tinan 1 suspende tinan 2

Iha 05 Dezembru 2022, Tribunál Distritál Suai prezide julgamentu ba krime ofensa ba integridade fizika simples natureza violénsia doméstika envolve arguidu Feleciano José FG hasoru nia feen EdSM, iha Munisípiu Covalima.

Akuzasaun prokuradór

Prokuradór akuza katak iha 06 Jullu 2022, iha oras tuku 07:30 dadeersan, iha Aldeia Gazalo Suku Belecasac Maucatar, arguidu tuku dala ida iha lezada nia hirus matan, lezada halai arguidu duni tuir, toman no baku dala barak iha lezada nia isin loloon no tebe dala ida iha lezada niaibun rezulta moras no ran. Antes ne'e arguidu telefone hela nia amante no lezada hasé no hirus arguidu no arguidu fila hirus lezada no halo agreasaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

Produsaun ba prova sira

Iha prosesu julgamentu arguidu hili direitu nonok.

Alende ne'e, lezada kontinua konfirma faktu sira iha akuzasaun no deklarata katak depoisde akontesimentu liu semana ida arguidu husu ona deskulpa no to'o agora arguidu labaku ona lezada, lezada deklarata tan katak antes ne'e arguidu nunka baku lezada no foin mak primeiravés baku lezada.

Alegasaun finál

Prokuradór, konsidera arguidu komete krime hasoru lezada, mesmu iha julgamentu arguidu hili lakolia maibé lezada kontinua konfirma faktu sira iha akuzasaun, haree ba kazu violénsia doméstika aas tebes nune'e prevene futuru krime atu la akontese, husu ba tribunál atu kondena arguidu ho pena suspensaun.

Alenden ne'e, defeza haktuir katak perante julgamentu arguidu hili direitu nonok maibé lezada kontinua konfirma, defeza haree katak depoisde akontesimentu sira di'ak malu fali no la iha tan ona problema seluk, tanba ne'e husu ba tribunál atu decide tuir konfiksaun tribunál nian.

Desizaun

Depoisde avalia faktu sira hotu, tribunál prova katak arguidu nia aktu ne'e priense elementu krime iha akuzasaun. bazeia ba faktu prova sira ne'e no tetu mós sirkuntansia agravante katak arguidu baku nia feen iha fatin publiku, tribunál mós tetu sirkuntansia atenuante sira hanesan arguidu foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ida suspende ba tinan rua.

7. Krime ofensa ba integridade fizika simples natureza violénsia doméstika

Nú prosesu : 0067/18.CVSUI

Kompozisaun Tribunál : Singulár

Juís : Dr. Naason Mário Armindo Marques Doutel

Prokuradór : Dr. Rafael Jeronimo Gusmão
Defeza : Domingos dos Santos
Desizaun : Absolve

Iha 05 Dezembru 2022, Tribunál Distritál Suai prezide julgamentu leitura sentensa ba krime ofensa ba integridade fizika simples natureza violénsia doméstika envolve arguidu BM hasoru nia eis feen UdS, iha Munisípiu Covalima.

Akuzasaun prokuradór

Prokuradór akuza katak lora la apura maibé iha fulan Novembru 2018 kalan, arguidu buti lezada nia kakorok no tuku dala ida iha kabun. Antes ne'e arguidu kalan atu sai ba nia kolega nia uma nune'e lezada hasee arguidu katak kalan ne'e labele sai ho ida ne'e arguidu ho lezada diskute malu no arguidu komete aktu refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (c), 35 (b) no 36 LKVD.

Produsaun ba prova sira

Iha prosesu julgamentu arguidu deklarata katak faktu prinsipal la loos hotu, arguidu deklarata katak momentu ne'eba arguidu ho lezada diskute malu kona-ba lezada la hatan arguidu sai iha kalan, arguidu nerboju tuku odamatan no tuku motor, no nia liman la kona lezada no moris separadu ona ho lezada.

Iha julgamentu lezada deklarata katak arguidu nerboju tuku dala ida iha liman no tuku dala ida iha ain parte loos, bainhira tribunál konfronta fali faktu iha akuzasaun hafoin lezada dehan faktu iha akuzasaun loos mak faktu foin koalia ne'e, no faktu balu lezada haluha ona tanba kleur ona, lezada haktuir katak separa ona ho arguidu desde problema akontese.

Alegasaun finál

Prokuradór haktuir katak, mesmu iha julgamentu arguidu nega katak labaku lezada maibé bainhira tribunál konfronta faktu iha akuzasaun lezada konfirma fali faktu ho razaun hirak ne'e husu ba tribunál kondena arguidu ho pena suspensaun.

Alenden ne'e, defeza husu ba tribunál atu deside tuir konfiksaun tribunál nian.

Desizaun

Depoide avalia faktu hotu, tribunál dúvida ba lezada nia deklarasaun katak iha julgamentu ne'e lezada nia deklarasaun lahanesan iha akuzasaun, tribunál fiar arguidu nia deklarasaun, nune'e tribunál konklui absolve arguidu husi krime.

8. Krime Dezobidiénsia no Krime Prátika Ilisita Artemarsias

Nú. Prossesu : 0101/21.PDSUA
Kompozisaun Tribunál : Singulár
Juís : Dr. Jose M. de Araujo

Prokuradór : Dr. Nelson Jose Magno
Defeza : Dr. Domingos dos Santos
Desizaun : Pena Prizaun fulan 4 suspende tinan 1

Iha 23 Dezembru 2022, Tribunál Distritál Suai prezide julgamentu leitura sentensa ba Krime Dezovidensia no Krime Pratika Ilisita Artemarsiasne'ebe envolve arguida Batista Guterres hasoru Estadu, iha Munisípiu Bobonaro.

Akuzasaun prokuradór

Prokurador akuza katak iha tinan 2018 arguidu fo'ó treinu ba nia Membru ho naran (Florentino Guterres, Izodoro Guterres, Alexandrino Pereira, Joe no Deni) ne'ebé hein hela prosesu, arguidu fo'ó treinu semana ida dala rua iha Loron Segunda ho Sabadu iha Oras tuku 19h-24h.

Iha 30 fulan Agustu tinan 2021, iha oras 19:00 lokraik, arguidu ho nia membru sira Florentino Guterres, Izodoro Guterres, Alexandrino Pereira, Manuel do Nascimento, Nico Mau Meta, Amilkra Pereira, Hipolito Pereira, Joe no Deni ne'ebé prosesu hela, hodi dirije ba Atambua Indonézia liu husi área ponte Nunura.

Iha 19 Setembru 2021, arguidu sira entrega-an iha Polisia Indonézia hamutuk ho arguidu sira seluk ho total 352 ne'ebé treinu iha munisípiu ketak-ketak.

Prokuradór akuza arguidu kontra artigu 244 KP kona-ba dezobidensia ho moldura penál tinan tinan 3 ka multa konjuga ho dekretu presidencia nú 69/2021 de Agostu de renovasaun estadu Emergencia iha teritoriu nasional tomak noartigu 2 husi lei Nú 5/2017 kona-ba pratika ilisita arte marsiais.

Produsaun ba prova sira

Iha julgamentu arguidu konfesa faktu sira hotu iha akuzasaun, arguidu deklara katak loos duni arguidu mak fó treinu ba nia membru sira ne'ebé temi ona iha akuzasaun, arguidu tan katak lori nia membru sira atu hasae sintu iha atanbua no liu husi ne'ebé liu husi ponte nunura. Arguidu arrepnde nia hahalok katak promete futuru sei la repete hahalok hanesan iha futuru.

Alegasaun finál

Prokuradór haktuir katak arguidu nia hahalok ne'e priense elementus krime tuir artigu 244 KP no lei nú 05/2017 arma brankas nian, nune'e husu ba tribunál atu kondena arguidu tuir faktu ne'ebé iha.

Entrtantu defeza haktuir iha julgamentu arguidu konfesa faktu iha akuzasaun no depoisde sira fila husi atanbua entrnga aan ba autoridade polisia, tanba ne'e husu ba tribunál atu aplika pena ne'ebé mais adekuadu ba arguidu.

Desizaun

Depoisde avalia faktu sira hotu, tribunál prova katak arguidu nia hahalok ne'e priense hotu kedan krime ne'ebé inputa ba arguidu.

Bazeia ba faktu proavu sira ne'e no tetu mós sirkuntansia hotu-hotu ne'ebé haleu krime, nune'e tribunál konklui prosesu ne'e no kondena arguidu ho pena prizaun fulan haat suspende ba tinan ida.

9. Krime Kontra Bandu

Nú. Prosesu : 0016/19.CVSL
Kompozisaun Tribunál : Koletivu
Juís : Dr. Jose M. de Araujo, Naason M. A. Marques Doutel no
Dra. Patricia de Araujo F. G. B. M. Xavier
Prokuradór : Dr. Rafael Jerónimo Gusmão
Defeza : Dr. Domingos dos Santos
Desizaun : Pena Prizaun tinan 2 suspende tinan 2

Iha 23 Dezembru 2022, Tribunál Distritál Suai prezide julgamentu leitura akordaun ba krime Kontra Bandu ne'ebé envolve arguida Elsiana de Araújo, Desi Delfiana Nunes, Jacinta Maria Otilia Sarmiento hasoru Estadu, iha Munisípiu Covalima.

Akuzasaun Prokuradór

Prokuradór akuza katak iha 07 Juñu 2019 iha oras 20:00 arguida sira komete krime Kontra Bandu ne'ebé kapturadu husi Unidade Patrullamentu Fronteira (UPF) iha área Nikir, postu Tilomar, Munisípiu Covalima tanba arguida sira ho kareta Bus-*Leandro* transporta material sira hanesan mina rai masa bo'ot hitu (7) gajoel masa bo'ot rua (2) no tabako marka *sek* hamutuk bal sanolu resin ualu (18) tanba ne'e polisia halo apreensaun imediata ba objetu hirak ne'e.

Konsekuénsia direita husi arguidu sira nia hahalok hodi halo importasaun ilegal ba Mina rai masa Bo'ot hitu (7) ho total 245 litrus, Gajoel masa bo'ot rua (2) ho total 70 litrus no tabako marka *Sek* hamutuk bal Sanolu resin ualu (18) la liu husi Alfândega hodi hamosu prejuizu ba Estadu.

Prokuradór akuza arguidu kontra artigu 316 KP kona-ba kontra bandu ho moldura penál tinan 2 to'o tinan 6 ka multa.

Produsaun ba prova sira

Iha julgamentu arguidu konfesa faktu hotu iha akuzasaun, arguidu deklarara arrepende nia hahalok no depoisde akontesimentu arguidu la hatama ona sasan.

Arguidu konfesa total faktu sira nune'e tribunál deside la rona sasin sira.

Alegasaun finál

Prokurador haktuir katak akuza arguidu sira ho krime Kontra Bandu previstu iha Art. 316^on.1 husi Kódigu Penál, iha julgamentu arguidu sira konfesa ba faktu sira hotu, nune'e husu ba tribunál atu kondena arguidu sira tuir konfiksaun tribunál nian.

Entrtantu defeza husu ba tribunál, pena ne'ebé adekuadu liu ba arguidu sira mak pena suspensaun.

Desizaun

Depoisde avalia faktu sira hotu, tribunál provadu arguidu sira komete krime kontra bandu. Bazeia ba faktu provadu sira ne'e tetu mós sirkuntansia hotu-hotu ne'ebé haleu krime ne'e nune'e tribunál konklui prosesu ne'e no kondena arguidu sira ho pena prizaun tinan rua suspende ba tinan rua.

10. Krime ofensa ba integridade fizika simples

Nú prosesu : 0043/22.PDSUA
Kompozisaun Tribunál : Singulár
Juís : Dr. Naason Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Absolve no pena prizaun fulan 6 suspende tinan 1

Iha 25 Novembru 2022, Tribunál Distritál Suai prezide julgamentu ba krime ofensa ba integridade fizika simples ne'ebé envolve arguidu Nelcen do Carmo, Antonio Barreto no Terezinha do Carmo hasoru lezada Jacinta de Jesus Silva, iha Munisípiu Covalima.

Akuzasaun prokuradór

Prokuradór akuza katak iha 01 Fevereiru 2022, iha oras tuku 8:00 dadeer iha Aldeia Laegatal Sucu Lour, Zumalai, arguidu Antonio basa dala ida iha lezada nia hasan parte loos no arguida Nelcen no Terezinha husi uma laran sai mai kaer lezada nia liman sorisorin no arguidu Antonio foti fatuk tuda dala ida iha lezada nia kotuk laran rezulta lezada monu tun no oin nakukun, antes ne'e arguidu Antonio foti foer soe fali iha lezada nia uma oin nune'e lezada sai mai hasé arguidu no sira diskute malu arguidu nerboju no komete aktu ne'e hasoru lezada.

Prokuradór akuza arguidu sira kontra artigu 145 KP kona-ba ofensa ba integridade fizika simples ho moldura penál tinan 3 ka multa.

Produsaun ba prova sira

Antes tama ba produsaun prova tribunál bazeia ba artigu 262 KPP, halo tentativa konsiliaun ba parte sira, maibé lezada lakoi no hakarak ba prosesu julgamentu.

Iha julgamentu, arguidu Antonio konfesa faktu sira katak arguidubasa duni dala ida lezada nia hasan no tuda dala ida iha kotuk laran, maibé arguidu rejeita katak tuda ne'e arguidu nain rua la kaer metin lezada nia liman, arguidu halo agreasaun ne'e hasoru lezada tanba lezada hatama rai rahun ba arguida Terezinha niaibun nune'e arguidu nerboju halo agreasaun refere hasoru lezada, alende ne'e arguida nain rua kontinua haktuir katak loos duni arguidu Antonio basa dala ida no tuda maibé momentu nia sai husi uma atu hafahe arguidu Antonio ho lezada tanba sira rua haksesuk malu. Arguida nain rua rejeita lakaer lezada nia liman.

Lezada kontinua konfirma faktu sira iha akuzasaun no deklar katak antes ne'e problema iha ona katak arguidu sira muda ninia lutu muda tan ba lezada nia rai.

Alegasaun finál

Prokuradór haktuir katak iha perante julgamentu arguidu Antonio konfirma faktu iha akuzasaun maibé arguida nain rua nega katak momentu akontesimentu ne'e arguida nain rua hafahe sira haksasuk malu, maibé lezada mai konfirma katak arguidu basa uluk lezada no arguida nain rua husi uma laran mai kaer metin lezada nia liman hafoin arguidu tuda tan lezada, tanba ne'e husu ba tribunál atu kondena arguidu sira ho pena suspensaun.

Entretantu, defeza haktuir katak iha julgamentu arguidu Antonio konfesa katak basa dala ida no tuda dala ida maibé arguida nain rua seluk deklar katak momentu husi uma laran mai atu hafahe sira, tanba ne'e husu ba tribunál atu absolve arguida nain rua husi krime ne'e no ba arguidu husu atu deside tuir tribunál nia konfiksaun.

Desizaun

Depoisde avalia faktu sira hotu, tribunál prova katak arguidu Antonio provadu komete krime hasoru lezada ne'ebé arguidu rasik konfesa, enkuantu ba arguida nain rua la priense faktu iha akuzasaun. tribunál bazeia ba faktu provadu no tetu mós sirkunstansia hotu hotu, nune'e tribunál konklui prosesu ne'e hodi absolve arguida nain rua enkuantu ba arguidu tribunál kondena ho pena prizaun fulan neen suspende ba tinan ida.

11. Krime furtu agravadu

Nú. prosesu : 0039/15.CVSUI
Kompozisaun tribunál : Koletivu
Juís : Dr. Naason Mário Armindo Marques Doutel, Dr. Jose Maria Araujo no Dra. Patricia de Fatima Xavier
Prokuradór : Dr. Rafael Jeronimo Gusmão
Defeza : Domingos dos Santos
Desizaun : Absolve

Iha 26 Dezembru 2022, Tribunál Distritál Suai prezide julgamentu leitura akordaun ba krime furtu agravadu envolve arguidu Melquior Moniz, Domingos Cardoso, Fernando Gonçalves no Antonio Agostinho Amaral hasoru lezadu Yang Xiaohan, iha Munisípiu Covalima.

Akuzasaun prokuradór

Prokuradór akuza katak iha 08 Dezembru 2015, iha oras tuku 21:00 kalan arguidu Fernando Gonçalves ba *supervisor* Jacinto Bere nia uma hodi informa katak *bateria* kareta nian tolu mak lakon, *bateria* ne'e ho folin kada *bateria* ida US\$500.00 hamutuk total US\$1500.00.

Antes ne'e bainhira arguidu seidauk serbisu iha kompañia la iha sasan ida mak lakon iha kompañia laran maske sasan sira ne'e tau iha fatin libre.

Depoisde liu tiha lora ida, iha loraik maizumenus iha oras tuku 16:20 hanesan ne'e baterai sira ne'e hetan fali iha tasi ibun besik kompañia.

Prokuradór akuza arguidu sira kontra artigu 252 KP kona-ba furtu agravadu ho moldura penál tinan 2 too tinan 8.

Produsaun ba prova sira

Iha prosesu julgamentu arguidu sira hili direitu nonok enkuantu lezadu *editál* no reprejenta husi prokuradór.

Iha tempu ne'eba testemuña serbisu hanesan *supervisor* depoimenta katak momentu sasan lakon ne'e arguidu informa ba testemuña katak *bateria* kareta nian tolu mak lakon, testemuña haktuir katak iha fali loraik komunidadu sira hetan fali bateria iha tasi ibun besik kompañia nian, testemuña haktuir tan katak kona-ba foti *bateria* ne'e la'os arguidu sira mak foti.

Testemuña Fransisco Oliveira depoimenta katak momentu ne'eba sasan lakon duni maibé se mak foti no tau besik fali iha kompañia nian no depois komunidadu mak hetan mak foin fó fali ba lezadu, testemuña haktuir katak la'os arguidu sira mak foti.

Alegasaun finál

Prokuradór haktuir katak perante julgamentu arguidu sira hili direitu nonok no lezadu editál maibé testemuña sira mai deklarara katak *bateria* lakon duni maibé la'os arguidu sira mak foti no depois liu lora ida mak foin hetan fali, tanba ne'e prokuradór husu ba tribunál atu fó justisa ba arguidu sira.

Enkuantu defeza haktuir katak perante julgamentu la iha ema ida mai deklarara katak arguidu sira mak foti sasan iha kompañia laran, tanba ne'e defeza haree katak arguidu sira nia aktu ne'e la priense krime furtu agravadu nune'e husu ba tribunál atu absolve arguidu sira.

Desizaun

Depoisde avalia faktu sira hotu, tribunál konsidera krime ne'ebé inputa ba arguidu sira ne'e la iha sasin ida mak mai deklarara katak arguidu sira mak na'ok bateria kareta nian. Tanba ne'e tribunál konklui prosesu ne'e hodi absolve arguidu sira.

12. Krime flora no fauna no ofensa ba integridade fizika simples

Nú prosesu : 0004/21.CVFHR
Kompozisaun Tribunál : Singulár
Juís : Dr. José Maria de Araujo
Prokuradór : Dr. Rafael Jeronimo Gusmão
Defeza : Domingos dos Santos
Desizaun : Omologa dezistencia keixa no Pena Prizaun fulan 3
Suspende Tinan 1

Iha 27 Dezembru 2022, Tribunál Distritál Suai preside julgamentu Krime flora no fauna no ofensa ba integridade fizika simples envolve arguidu Delfin de Araujo, Mario Soares no Armando Machado hasoru lezadu Arius da Cruz Moniz no Florindo Moniz, iha Munisípiu Covalima.

Akuzasaun prokuradór

Prokuradór akuza ktak iha 17 Agostu 2021 iha oras tuku 19:30 kalan, lezadu sira halo seguransa iha sira nia to'os tanba ema deskonesidu sempre na'ok ai-kameli iha lezadu sira nia to'os. Lezadu sira iha hela to'os laran lakleur lezadu sira rona ema tesi aikameli monu tarutu, lezadu sira hakilar katak imi halo saida, maibé arguidu responde imi mai buka saida no arguidu sira tuku kedan dala ida iha lezadu Arius nia kotuk laran no tuku dala rua lezadu Florindo nia hirus matan parte karuk, depoisde lezadu sira hakilar dehan ema na'ok ai-kameli nune'e comunidade sira sai hodi duni arguidu sira no konsegue kaer arguidu sira hotu.

Prokuradór akuza arguidu kontra artigu 217 KP kona-ba hasoru flora no fauna ho moldura penal tinan 3 ka multa no artigu 145 KP kona-ba ofensa ba integridade fizika simples ho moldura penal tinan 3 ka multa.

Produsaun ba prova sira

Antes tama ba julgamentu ba krime flora no fauna, tribunál bazeia ba artigu 262 KPP kona-ba tentativa konsiliaun ba kazu ofensa ba integridade fizika simples. Iha tentativa konsiliaun ne'e lezadu sira hakarak dada sira ninia keixa hasoru arguidu sira tanba sei iha relasaun família, alende ne'e arguidu sira mós konkorda ho lezadu sira nia pedidu dezistencia keixa, tuir mai tribunál omologa prosesun ne'e no kontinua julgamentu ba kazu hasoru flora no fauna.

Iha julgamentu arguidu sira hili direitu nonok.

Testemuña Florindo Moniz, depoimenta katak momentu iha ne'eba haree arguidu sira mak tesi aikameli no banhira comunidade tun kaer arguidu sira arguidu sira la lori aikameli.

Alegasaun finál

Prokuradór, haktuir katak mesmu iha julgamentu arguidu sira hili direitu nonok maibé testemuña hatete katak arguidu sira mak tesi ai-kameli, tanba ne'e husu ba tribunál atu kondena aeguidu sira ho pena suspensaun.

Entretantu, defeza haktuir katak iha julgamentu arguidu hili direitu nonok maibé testemuña hatetet katak arguidu sira mak tesi, nune'e husu ba tribunál atu fó justisa ba arguidu sira.

Desizaun

Tribunál omologa krime ofensa ba integridade fizika simples, enkuantu ba krime flora no fauna, arguidu sira provadu komete krime refere, bazeia ba faktu provadu sira no tetu mós sirkuntansia hotu-hotu iha krime ne'e nune'e tribunál konklui prosesu ne'e no kondena arguidu sira ho pena prizaun fulan tolu suspende ba tinan ida.

13. Krime abuzu seksuál menór ho agravasaun

Nú. prosesu : 0024/19.ANANV
Kompozisaun Tribunál : Koletivu
Juís : Dra. Patricia de Fatima Xavier Dr. José Maria de Araujo no
Dr. Naason Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Jonas Henrique da Costa
Desizaun : Pena prizaun tinan 12

Iha 27 Dezembru 2022, Tribunál Distritál Suai prezide julgamentu leitura akordaun ba krime abuzu seksuál ba menór ho agravasaun envolve arguidu MdA hasoru lezada VdS, iha Munisípiu Ainaro.

Akuzasaun prokuradór

Prokuradór akuza katak iha 12 Setembru 2019 iha oras tuku 12:34 meudia, arguidu lori lezada ba uma no fó etu ba lezada no han hotu tiha arguidu lori lezada ba kuartu laran, arguidu hasai lezada nia roupa no arguidu mó's hasai nia roupa no halo relasaun seksuál hasoru lezada. Depoide relasaun seksuál hotu arguidu lori lezada ba uma no lezada nia aman (testemuña) husu lezada *ó han ona ka seidak* no lezada hatan dehan ohin hau han ona iha Avo Martinho nia uma no avo halo relasaun seksuál ho hau. Nune'e testemuña mós ba husu kedas arguidu maibé arguidu nega.

Loron tuir mai testemuña lori lezada ba tuir ezaminasaun iha Mediku maibé ezaminasaun ne'e la kompletu tanba lezada tauk no tanis, tanba lezada lakohi atu mediku sira haree lezada nia orgaun seksuál.

Prokuradór akuza arguidu kontra artigu 177 KP kona-ba abuzu seksuál menór ho moldura penál tinan 5 to'o tinan 20 no artigu 182 KP kona-ba agravasaun.

Produsaun ba prova sira

Iha prosesu julgamentu arguidu konfesa faktu hotu iha akuzasaun no deklarata katak momentu halo relasaun ne'e tanba diabu mak tenta arguidu, arguidu rekuñese katak ninia hahalok ne'e ladi'ak.

Arguidu konfesa nune'e presinde lezada hodi laronia nia deklarasaun.

Alegasaun finál

JSMP la monitoring faze alegasaun tanba tama ona feriadu judisiariu .

Desizaun

Depoide avalia faktu sira hotu, tribunál prova katak arguidu komete krime abuzu seksuál ba menór hasoru lezada no arguidu rasik konfesa.

Bazeia ba faktu provadu sira ne'e no tetu mós sirkuntansia hotu hotu ne'ebé haleu krime, nune'e tribunál konklui prosesu no kondena arguidu ho pena prizaun tinan 12.

14. Krime Prátika Ilísita Arte Marsiais

Nú. Prossessu : 0019/20.BBCLC
Kompozisaun Tribunál : Singulár
Juís : Dr. Jose M. de Araújo
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena Prizaun Fulan 6 Suspende Tinan 1

Iha 27 Dezembru 2022, Tribunál Distritál Suai prezide julgamentu leitura sentensa ba prátika ilísita arte marsiais envolve arguidu Florindo Soares hasoru estadu, iha Munisípiu Bobonaro.

Akuzasaun Prokuradór

Prokuradór akuza katakiha lora la apuradu mibé iha 2019 to'o fulan Agostu 2020, arguidu mak fó treinu ba nia oan menór Dircia Brifilia Soares semana ida dala rua, banhira treinu remata, bainhiira atu kesi sintu (sae sabuk) arguidu haruka nia oan ba kesi sintu iha Indonezia Atanbua.

Prokuradór akuza arguidu kontra artigu 24 no artigu 2 ho moldura penál tinan 3, husi lei nú 5/2017.

Produsaun ba provas Sira

Iha julgamentu arguidu konfesa faktu iha akuzasaun, arguidu deklara katak nu'udar treinador PSHT ne'ebé fó treinu ba nia oan Dircia Brifilia Soares, arguidu fó treinu ba nia oan d'eit la'os ba ema seluk, arguidu arrepende nia hahalok no depoisde akontesimentu to'o agora la fó treinu ona.

Alegasaun finál

Prokuradór konsidera arguidu komete krime prátika ilísita arte marsiais ne'ebé arguidu rasik konfesa, prokuradór intende katak arguidu hatene hela estadu taka hela arte marsiais hanesan KORR, PSHT no Kerasakti, maibé arguidu kontinua fó trinu ba membru sira, tanba ne'e husu ba tribunál atu kondena arguidu tuir lei nú 5/2017 kona-ba arte marsiais.

Enkuantu defeza hare katak arguidu konfesa tuir faktu sira ne'ebé mak iha no arguidu mós foin primeiravés mai hatan tribunál, nune'e husu ba tribunál atu tetu didiak antes foti desizaun.

Desizaun

Depoisde avalia faktu sira hotu, tribunál prova katak arguidu fó trenu duni ba nia oan no arguidu rasik konfesa. Bazeia ba faktu provadu sira ne'e no tetu mós sirkuntansia hotu-hotu nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>